

Wider die dritten vorschung der vngedult
lert der engel also O mensch ker dein gemut
von vngedult durch die der teufel mit seiner
totlicher reyszüge nicht anders suchet dan den schade
deiner sel durch die deine sele vorlore wirt zu gleicher
weise als durch die gedult behalden. Wan Grego-
rius spricht kein vngedultiger wirt entpfahenn das
reich der himmel. Darumb hab keyn vordrissenn yn
dem leiden Das gegen deiner missetat klein ist. vnd
ist doch als ein segefener vñ ablegunge deiner sunte
Wan du sie gedultigklich willigklich vnd yn danck-
barkeyt leyden wilt Wen gregorius spricht got der
herre suget vnß zu zeitlich straffe die ewigē rachsüge
zu vermeiden Vnd Augustinus herre brenne vnd
schmyd mich hie das du mir ewigklichen vbersehest
Dar vmb laß dich keyn trubßal bekummern. Wenn
sie zeigen das dich cristus nicht vorlassen wil Als au-
gustinus spricht die boße ding die auch hie peinigē die
zwingē auch zu gehē zu got darumb so wirt dz heil
der sele nicht in leiplicher wollust beweiset sunder ewi-
ge vordammuß Als augustinus spricht Ein zeichen
der gewissen vortumpnuß ist zeitlich geluck vnd liep
gehat werden von der werlet vnd mer spricht er Es
ist ein wunder das den die vortumpft werden sollen
nicht alle stein entgegen springē zu einer freude vnd
den zu schaden die behalden werden solle Darumb
treib vngedult auß deinem gemut als das gift vnd
entpfach gedult als ein starckenn schilt mit dem alle
fund der sele vberwunden werden. Vnd sich an
die gedult christi vnd seiner heyligen biß yn den todt.
Czu mercken das die vngedult bald ist auß zu treibē
wen sie zeucht den menschem von got darumb biß